

Akileraarusiinernik Aalajangiisartut aalajangiinerat:

Ilisarnaat: 2017-1193
Aalajangiisoqarpoq: novembari 9, 2017
Aalajangiinerup tamanut saqqummiunneqarnera:
Ukioq aningaasarsiorfiusoq: 2015
Sammisaq: Akileraarutit
Sammineqartup oqaasertai: Iluanaarutisianut tunniunneqartunut ilanngaat

Eqikkaaneq

Naammagittaalliorneq ukiumi katersiffiusumi iluanaarutisianut tunniunneqartunut ilanngaatiq itigarti-tsissutigineranut tunngassuteqarpoq.

Iluanaarutisiat tunniunneqartut ukiumi tunniussiffiusumi ilanngaatigineqarnatik ukiumi katersiffiusumi ilanngaatiginissaannut naammagittaalliortoq isumaqatigineqanngilaq. Aalajangiinermi ukiumi katersiffiusumi iluanaarutisianut ilanngaateqartitsinissaq pillugu qinnuteqaammik tigusaqartoqarsimanninnera aamma ingerlatseqatigiiffiup ingerlataqannginnera atorunnaalernalu pingaartinneqarsimapput.

Suliami pissutsit piviusut

Naammagittaalliortoq ingerlatseqatigiiffiuvoq; XX-ip pigisanik aalaakkaasunik piginnittuuneq attartortit-sinerlu pingaarnertut sammisarai.

Ukiumi aningaasarsiorfiusumi 2015-imi naatsorsuutitigut angusat 41439 kr.-inut naatsorsorneqarput, taakkulu XX-imit naammagisimaarneqarput, tassami ingerlatseqatigiiffiup pigisaa kingulleq ukiumi aningaasarsiorfiusumi tunineqarsimammat. Ingerlatseqatigiiffiup 2014-imi angusai 1454445 kr.-iusimapput.

2015-ip naalernerani ingerlatseqatigiiffiup pigisai taamaallaat kaaviiartitatigut pigisatigut 2117023 kr.-inik naleqarput. Nammineq aningaasaatit 2092023 kr.-inut naatsorsorneqarput, taakkunanngalu naatsorsuutit malillugit 1800000 kr.-nit iluanaarutisiatut tunniunneqassasut siunnersuutigineqarluni.

Ukiumut aningaasarsiat akileraaruteqaataasussat akileraarutininut naatsorsuutit nassiunneqartut malillugit -367993 kr.-inut naatsorsorneqarput, tassami iluanaarutisianut 1800000 kr.-iusunut tunniunneqartunut nalikilliliinernut ilanngaatinullu iluarsisoqarsimammat. Akileraarutininut naatsorsuutit iluanaarutisiantut nalunaarutininut aamma iluanaarutisianut uppenarsaatinut ilanngullugit nassiunneqarput. Ukiumut aningaasarsiorfiusumut 2015-imut tunngatillugu iluanaarutisiat tunniunnissaannut akuersissut pillugu qinnuteqaat 2015-imut nammineerluni nalunaarsuiffimmut ilanngunneqarsimannngilaq. Ataatsimeersuarnermi ukiumut aningaasarsiorfiusumut 2015-imut tunngatillugu 2016-imi maajimi iluanaarutisiatut 1,8 mio. kr.-nit tunniunneqassasut akuersissutigineqarpoq. Iluanaarutisiat tunniunneqareerput, iluanaarutisianullu 756000 kr.-nit akileraarutaapput.

Ukiumi aningaasarsiorfiusumi 2016-imi iluanaarutisiat 1800000 kr.-nit tunniunneqarnerannut ukiumi aningaasarsiorfiusumi 2015-imi akileraarutitigut ilanngaatiq Akileraartarnermut Aqutsisoqarfiup akuersimannngilai.

Ukiumi aningaasarsiorfiusumi 2016-imi ingerlatseqatigiiffiup aningaasarsiat akileraaruteqaataasussat - 29655 kr.-nit nammineerluni nalunaarsorsimavai. Ukiumi tassani kaaviiartitsisoqarsimangilaq. Aqutsisut nalunaarutaat malillugu suliffeqarfik atorunnaalerpoq.

Ukiumi aningaasarsiorfiusumi 2015-imi sinneqartoorutitut ukiumi aningaasarsiorfiusumi 2016-imi tunniunneqartunut ilanngaait akuerineqarsimmata 2016-imut aningaasarsiat akileraaruteqaataasussat Akileraartarnermut Aqutsisoqarfiup -1829655 kr.-inut allangortippai. Akileraartarnermut Aqutsisoqarfiup ukiumut aningaasarsiorfiusumut 2015-imut tunngatillugu allanguinerata malitseqartinneratigut allanguisoqarpoq.

Naammagittaalliuuteqartup paasinninnera

XX-ip aalajangiusimavaa 2015-imi iluanaarutisianut 1432007 kr.-inik ilanngaateqarnissaq akuerineqassasoq, taamaalillutik aningaasarsiat akileraaruteqaataasussat peruserineqartut nalinginnaasut malillugit 0 kr.-inut angissusilerneqarsinnaassammata, akileraarutinullu katillugit akiliutigineqartussat ukiumut tassunga 756000 kr.-inngorlugit (iluanaarutisianut akileraarut).

Naammagittaalliummi ilaatigut imatut erseqqissaasoqarpoq:

- Aalajangersimasumik periutsit malillugit iluanaarutisiat ukiumi tunniussiffimmiunngitsumi ukiumi katersiffimmi ilanngaateqartinnissaat pillugit immikkut qinnuiginninnermik piumasaqaateqartoqartoq. Ukiumi aningaasarsiorfiusumi 2015-imi iluanaarutisianut ilanngaateqartitsinisamat itigartitsineq ilumut katillugit 84,6 %-imik akileraartitsisoqarluni marloriaammik akileraartitsinermik kinguneqartussaasoq.
- Iluanaarniarnissamik siunertaqarneq pillugu aalajangiusimasaqarneq itigartinneqartariaqartoq, tassami 2015-imi iluanaarutisianut ilanngaatinut peruseralugu toqqarneqartoq Nunatta Karsianut iluaqutaanerussamat naammagittaalliummi ilanngussami periutsimut takutinneqartumut sanilliullugu.
- Ingerlatseqatigiiffik Akileraartarnermut Aqutsisoqarfimmi oqaatigineqartutut piffissaq sivikitsoq atorlugu suujunnaarsinneqarsinnaasoq, tassami Akileraartarnermut Aqutsisoqarfik taannaamat ingerlatseqatigiiffiup suujunnaanginnerani akileraarutitigut uppersaasussa.
- § 27, imm. 3-mut nassuiaatini iluanaarniarnerup qanorpiaq paasisariaqarneranut assersuutissaqanngimmat.

Aalajangiusimasaqarnermut tunngavilersuutitut makku saqqummiunneqarput:

- Akileraartarnermut Aqutsisoqarfiup ilanngaateqartitsinissamat itigartitsinera marloriaammik akileraartitsinissamik kinguneqarpoq, tassami ingerlatseqatigiiffimmi aningaasarsiarineqartut iluanaarutit ilanngaaffiginissaat sioqqullugu akileraaruserneqartussaammata, peqatigitillugulu iluanaarutitut tunniussanut iluanaarutitut akileraarummik akiliisoqartussaalluni.
- Nammineerluni nalunaarsuiffik maajip ulluisa pingajuanni tunniunneqarsimavoq, ullorlu 11. maj ataatsimeersuarneq sioqqullugu Akileraartarnermut Aqutsisoqarfik isummersimasinnaagaluarpat ukiumi tassani marloriaammik akileraartitsinissaq pinngitsoortinneqarsimasinnaa-

galuarpoq, tassami ingerlatseqatigiiffik tamanna aqqutigalugu iluanaarutisianik tunniussingitsoorsimassagaluarimat. Iluanaarutitut ataatsimeersuarnermi akuersissuteqarnek al-
lanngortinneqarsinnaangilaq, Akileraartarnermullu Aqutsisoqarfiup aalajangiinera XX-ip aki-
liisinnaajunnaarneranik kinguneqarpoq.

- Piffissami qaninnermi ingerlatseqatigiiffiup suujunnaarsinniarnanun tunngatillugu iluanaarnis-
saq pineqangilaq, tassami ingerlatseqatigiiffiup tassangaannaq iluanaarutisianik tunniussi-
nani suujunnaarneratigut akileraarutit annikinnerit pissarsiarineqarsimassagaluarmata.

Inatsisitigut malittarisassanut inatsisitigullu periutsinut innersuussinert

Iluanaarutisianut tunniussanut ilanngaateqartitsinissamut Aningaasarsianit akileraarutit pillugit
inatsimmi § 27-imi inatsisitigut tunngavissaqanngilaq (Aningaasarsianit akileraarutit pillugit Inatsisartut
inatsisaat nr. 12, 2. november 2006-imeersoq).

Ataatsimut isigissagaanni aningaasarsianit akileraaruteqaataasussanit ilanngaateqartitsinissaq pi-
umasaqaataavoq, tassalu aningaasartuutit ukiumi tassani aningaasartuutaasimappata, takuuk anin-
gaasarsianit akileraarutit pillugit inatsimmi § 24.

§ 27-imi pingaarnertut malittarisassaq matumunnga taamaalilluni naapertuuppoq, tassami iluanaaruti-
sianut piginnittunut tunniunneqartunut taamaallaat ilanngaateqartoqarsinnaammat ukiumi siuliini sin-
neqartoorutit insertarisimasanut, takuuk § 27, imm. 1.

Pingaarnertut malittarisassani minitaatut § 27, imm. 3-mi tunngaveqarluni ukiumi aningaasarsiorfimm
sinneqartoorutit iluanaarutisiat katersorneqarfianni ilanngaatigineqarsinnaapput. Ilangaatigineqartus-
sanut akuersissummik akileraaruseriffik tunniussissaaq. Akuersissut piumasaqaataasinnaavoq. Uki-
umut aningaasarsiorfiusumut ilanngaateqartitsisoqarnissaanik kissaateqarfiusumut nammineerluni
nalunaarsuiffik peqatigalugu ilanngaatinut qinnuteqaat tunniunneqassaaq.

*§ 27. Selskabit, brugsforeningit, suliffeqarfillu suleqatigiinnikkut ingerlassat § 1, imm. 1, nr. 3, 4, 6 aamma 7-
imi pineqartut aningaasarsiat akileraaruteqaataasussat naatsorsorneranni iluanaarutit peqatigiit imaluunniit
sulliviup ukiumi aningaasarsiorfimm kingullermi imaluunniit siusinnerusumi iluanaarutigisimasaanit pigin-
neqataasunut ilaasortanulluunniit tunniunneqarsimasut ilanngaatigisinnaavaat. Taamatuttaaq § 1, imm. 1, nr.
10-mi taaneqartut peqatigiiffiit erniatigut iluanaarutiminnik pissarsiaminnillu ilaasortaminnut ukiumi kingullermi
siusinnerusukkulluunniit ukiumi aningaasatigut insertitaqarfimmit sinneqartoorutiminnik pissarsisitsippata.
Imm. 2.*

*Imm. 3. Iluanaarutisiat ukiumi aningaasarsiorfiusumi kingullermi siusinnerusumiluunniit sinneqartoorutit
ilaannit agguagarsiatut aktiaatilinnut, anpartiutilinnut, piginneqataassutilinnut ilaasortanulluunniit tunniun-
neqartut ukiup aningaasarsiorfiup siuliani aningaasarsianit akileraaruteqaataasussanit ilanngaatigineqarsin-
naanerat akileraaruseriffimmut qinnuteqaateqarnikkut akuersissutigineqarsinnaavoq. Akileraaruseriffimmut
qinnuteqaat nammineerluni nalunaarsuiffiup tunniunneqarneranut ilutigitillugu tunniunneqassaaq.*

Imm. 4.

Imm. 5.

Imm. 6.

§ 27 siusinnerusukkut aningaasarsianit akileraarutit pillugit inatsimmi § 19-iusimasumiit ingerla-
teqqitaavoq. Imm. 3 Inatsisartut inatsisaannut nr. 6, 10. april 2003-meersumut ilanngussaavoq. Taa-
manikkut allannguinermut nassuiaatini tunngavilersuutitut ima saqqummiisoqarpoq:

Selskabit aktiatigut piginnitsiminnut iluanaarutisiatut tunniussatik, maleruagassat atuuttut naapertorlugit ukiumi tunniunneqarfianni ilanngaatisarpaat. Iluanaarutisiali tunniunneqartartut ukiup tunniunneqarfimmik siulianeersuusarput, taamaattumik ukioq isertinneqarfiat ukiorlu ilanngaatigineqarfiat assigiinneq ajorput, selskabillu ukiumi tunniussaqaqarfimmi aningaasarsiai akileraaruteqaataasussat amigartoorutaasimappata, selskabip ukiumi tunniussaqaqarfimmini akileraarutitigut sipaarutit aningaasannorlugit maluginavianngilai, akerlianilli selskabip amigartoorutaasa amerlanerulernerat kisiat malugissallugu.

Taamaattumik siunnersuutigineqarpoq selskabit iluanaarutisiatut tunniussat, ukiumi aningaasarsiorfimmi iluanaarutisiat attuumassuteqaqfigisaanni ilanngaatiginissaannut Skatterådimit akuersissuteqaqfigineqarnissaminnik qinnuteqarsinnaanissaat, taamaattorli rådip isumaa malillugu selskabip akuersissut taamaattoqatornerlunniarpagu, soorlu piffissami ungasinngitsumi selskabip atorunnaarsinnissaanik siunertaqarluni, Skatterådi taamatut akuersissuteqaqarnissamini piumasaqaatinik aalajangersaasinnaatillugu.

Inatsisinut aalajangersagaq atorneqalermat Akileraarusiinermit Aalajangiisartut tassaasimapput iluanaarutisianut tunniunneqartunut ilanngaatit saqqummiunnissaannut akuersissuteqarsinnaasimasut. 2006-imi Aningaasarsianit akileraarutit pillugit Inatsisip nutaap atulerneratigut piginnaatitsissut Akileraarnermut Aqutsisoqarfimmut nuunneqarsimavoq.

Massakkut Aningaasarsianit akileraarutit pillugit inatsimmi atuuttumi aalajangersakkanut nassuiaatini § 27, imm. 3-mi minitaqarnissamut aalajangersakkami imatut erseqqissaasoqarpoq:

Imm. 3-mi aalajangersakkap kinguneraa Selskabit il.il. piginneqataassutinit pissarsiat akilernerqartut ukiumi isertitsiviusumi ukiumi tassani piginneqataasut pissarsiaasa ilanngaatigineqarnissaannut akuersissummik akileraaruserivimmut qinnuteqarsinnaanerat. Taamaaliornikkut ukiup isertitsivisup ukiullu ilangaateqarfiusup assigiinnerat kiisalu akileraarutitigut ilangaatit piginneqataasut iluanaarutit akilernerqartut amerlaqatigigaat qulakkeerneqassapput, selskabip isertitaasa akileraarusigassat takutikkaluarat ukiumi piginneqataasunut pissarsiaqartitsiviusumi aammalu aktiaateqartunut, anparteqartunut, piginneqataassutinillu pigisaqartunut ilaasortanulluunniit akiliiffiusumi amigartooruteqartoqarpoq. Selskabit il.il. taamatut akuersissuteqarnermi siunertarineqanngitsumik iluaquteqarnissaat pinngitsoornialugu siunnersuutigineqarpoq, akileraaruseriffik piumasaqaatinik aalajangersaasinnaasasoq, siunertarineqanngitsunik akileraarutitigut iluaquteqarsinnaanermut illuatungiusinnaasunik, siunertaq pingaarneq imaluunniit siunertat pingaarnerit ilaat malittarisassamik iluanaarniarfiginninnermit siunertarineqarpat.

Malittarisassap iluanaarniutigineqarneranut assersuutaasinnaapput selskabip isertitai amigartooruteqarfiusut, taamaalillunilu selskabip ukiumi isertitsiviusumi amigartoorutini annertusarniarai, selskabi qanittumi nunamut allamut nuunnialersaartoq, selskabi piffissami qanittumi atorunnaarsinniarneqalersaartoq, selskabi piffissami qanittumi ingerlatsinermut akileraarutaaffiusussaannngitsumut nuunnialersaartoq, selskabi piffissami qanittumi selskabimut allamut kattunnialersaartoq imaluunniit selskabi piffissami qanittumi piginnittumik ingerlataminilluunniit taarsiinialersaartoq. Assersuutigineqartut tamakkiisuunngillat.

Selskabi allakkatigut akileraaruseriffimmiut nammineq nalunaarsuiffik tunniussinermut atatillugu qinnuteqaateqassaaq. Akileraaruseriffiup ukiumut ataatsimut akuersissuteqarsinnaavoq imaluunniit pi-umasaqaatitalimmik ataavartussamik akuersissuteqarsinnaalluni.

*Selskabinut ukiumi isertitsiviusumi iluanaarutinut attuumassuteqartumi, iluanaarutinik ilanngaa-
teqarsinnaanermut akuersissummik qinnuteqarnissamik kissaateqanngitsunut malittarisassat atuuttut
atuutitiinnarneqassapput, tassa ukiumi isertitaqarfiusumi iluanaarutit agguanneqarfigisaanni tamakki-
isumik ilanngaatigineqarsinnaanerat, taamaaliornikkut isertitat akileraarusigaasussat amigartoorutaa-
lernissaat apeqqutaatinnagu.*

Siusinnerusukku Aningaasarsianit akileraarutit pillugit Inatsimmi aalajangersakkap atulerneranut ata-
tillugu ukiumi katersiffiusumi iluanaarutinut ilanngaateqarnissaq pillugu qinnuteqaatit Akileraarusiiner-
mik Aalajangiisartunit suliarineqarnissaannut atugassamik suleriaatsinut nassuiaatinik suli-
aqartoqarsimavoq. Ilaatigullu tassani takuneqarsinnaavoq:

- qinnuteqaat kingusinnerpaamik nammineerluni nalunaarsuiffiup naatsorsuutillu tunniunnerat peqatigalugit tunniunneqassasoq, pissarsianut akileraarutit akuersissutiginerata kingorna kingusinnerpaamik qaammat qaangiutsinnagu akileneqassasoq, ukiunilu siuliini ilanngaatigineqartut akuersissuteqartoqarsimappat tamanna utaqqqqaarnagu
- aningaasarsiani akileraaruteqaataasussani pissarsianut ilanngaatit akileraarutitigut nalikillilinerit sioqqullugit ilanngaatigineqassasut aamma aningaasarsiat akileraaruteqaataasussat pissarsiat ilanngaatigereernerisigut pitsaanngitsumik inerneqassanngitsut

Ilanngullugu takuneqarsinnaavoq akileraarutitigut piaarinani anguniakkat suujunnaarsinniarlugit akuersissuteqarnissamut immikkut piunasaqaatinik aalajangersaasoqarsinnaasoq, soorlu malittarisassaq aqputigalugu iluanaarniarsinnaaneq. Iluanaarniarsinnaanermut assersuutitut taaneqarsinnaapput:

1. ingerlatseqatigiiffiup isertitai pitsaanngitsumik inerneqartut
2. ingerlatseqatigiiffik piffissami qaninnermi nunanut allanut nuunnissamik pilersaartoq
3. ingerlatseqatigiiffik piffissami qaninnermi atorunnaarniartoq
4. ingerlatseqatigiiffik piffissami qaninnermi suliffeqarfimmut akileraarneq ajortumut nuunniartoq
5. ingerlatseqatigiiffik piffissami qaninnermi ingerlatseqatigiiffimmik allamik suleqateqarnialersaartoq
6. ingerlatseqatigiiffik piffissami qaninnermi piginnittuminik suliarnilluunniit allanngortitsinialersaartoq

Akileraaruserinermik Aalajangiisartut kingornagullu Akileraartarnermut Aqutsisoqarfiup suleriaatsimut nassuiaat naapertorlugu ukiumi katersiffiusumi ilanngaatit pillugit inatsisitigut aalajangersagaq aqutarisimavaat. Akuersissutit pillugit qinnuteqaatit qinnuteqaatit tunngavigalugit suliarineqartarsimapput, ilanngaatigineqartussallu arlalerliarlugit aningaasarsiat akileraaruteqaataasussat pitsaanngitsumik inerneqarnissaat innersuussutigalugu killeqartinneqartarsimapput.

Akileraarusiinernik Aalajangiisartut aalajangiinerat tunngavilersuinerallu

Ukiumi tassani iluanaarutitut tunniunneqartunut ilanngaait pingaarnertut malittarisassanit minineqarnerat, tamannami akuersissuteqarnissamat piumaneqarmat, tunngavineqarpoq. Tamanna pissutigalugu akuersissutip ingerlaannaq tunniunneqarnissaa XX-ip naatsorsuutigissanngilaa. Qinnuteqaammik immikkut ittumik tunniussisoqarsimagaluarpalluunniit imaluunniit iluanaarutisianut nalunaarummi maajip naalernani nammineerluni nalunaarsuiffimmut ilanngullugu tunniunneqartumi erseqqissaasoqaraluarpalluunniit, ingerlatseqatigiiffiup naatsorsuutigissanngilaa ataatsimeersuarneq maajip qiteqqunera sioqqullugu ingerlanneqartoq sioqqullugu Akileraartarnermut Aqutsisoqarfiup isummersimanissaa. Ingerlatseqatigiiffiup akuersissummik Akileraartarnermut Aqutsisoqarfimmiit tunineqarsimatinnagu Akileraartarnermut Aqutsisoqarfiup isummerneru ingerlatseqatigiiffiup tunngavitut atorsinnaangilaa.

Iluanaarutisianut ukiumi sinneqartoorutit katersaaffianni ilanngaatineqarnissaannut akuersissummik tunniussinissamik Akileraartarnermut Aqutsisoqarfimik piginnaatitaavoq. XX akileraartarnermut inatsisit malillugit iluanaarutisianut tunniunneqartunut ilanngaaffigineqarsinnaatitaavoq, akerlianilli XX ukiumi katersiffiusumi ilanngaaffigitinnissamat akuersissuteqartoqarnissaanik piumasaqarsinnaanani. XX aamma ukiumi aningaasarsiorfiusumi ukiumut katersiffiusumut tullinnguuttumi iluanaarutisianut tunniunneqartunut ilanngaaffigineqarsinnaatitaavoq, matumani ingerlatseqatigiiffiup isertitai akileraaruteqaataasussat pitsaanngitsumik inerseqarsimanissaat apequtaanani. Ingerlatseqatigiiffiup ukiumi katersiffiusumi isertitai pitsaanngitsumik inerseqarsimanissaat piumasaralugu Akileraartarnermut Aqutsisoqarfik aalajangersimasumik periuseqarpoq.

Iluanaarutisianut ukiumi katersiffiusumi ilanngaateqartoqassappat ilanngaatinut akuersissuteqarnissaaq pillugu qinnuteqartoqarsimanissaa piumasaqaataavoq. Ukiumi katersiffiusumi iluanaarutisianut tunniunneqartunut ilanngaateqartoqarnissaa pillugu qinnuteqaammik Akileraartarnermut Aqutsisoqarfik tigusaqarsimangilaq.

XX-ip ingerlatani kingullit 2015-imi ingerlatariunnaarpai, ukiumilu aningaasarsiorfiusumi 2016-imi ingerlatsineq aqutigalugu isertitaqartoqarsimanani. Ingerlatseqatigiiffik taamaalilluni ukiumi aningaasarsiorfiusumi 2016-imi sulianik aallartitaqarsimangilaq, ingerlatseqatigiiffiullu sammisaqarnissai nutaat pillugit ingerlatseqatigiiffiup pilersaaruteqarneranut paasissutissanik peqartoqanngilaq. Taamaammat ukiumut aningaasarsiorfiusumut 2015-imut tunngatillugu imm. 3-p imikkut aalajangersakkap atornissaanut akuersissuteqarneq XX-ip pisariaqanngitsumik iluaqusernissaanik kinguneqarnissaa ilimagisariaqarpoq, tassami imm. 1-imi pingaarnertut malittarisassaaq malillugu iluanaarutisianut ilanngaammik atuinissamik ingerlatseqatigiiffik periarfissaqassanngimmat. Akileraarusiinernik Aalajangiisartut isumaat malillugu ukiumi katersiffiusumi ilanngaateqartoqarnissaa pillugu qinnuteqaatip nalilersornerani taamaallaat ingerlatseqatigiiffiup ingerlannera isiginiarneqartussaammat, tassa ingerlatseqatigiiffik nammineerluni akileraartussaataammat. Taamaammat naliliisoqarnerani ingerlatseqatigiiffimmi piginneqataasunilu akileraarutit tamarmiusut isiginiarneqassanngillat.

Akilerartarnermut Aqutsisoqarfiup ukiumi katersiffiusumi 2015-imi ilunaarutisianut ilanngaatinut itigartitsinera aalajangiusimaneqarpoq. Taamaalilluni XX naammagittaalliornerminut isumaqatigineqanngilaq.

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 27 inatsisitigut innersuussutigineqarpoq.